



USAID
HUSI POVU AMERIKANU



Estado do Homen ba Estado da Lei: Susesaun Komandu Iha Instituisaun Militar Timor-Leste

Mahein Nia Hanoin Nú. 11, 29 Juñu 2016



Foto: F-FDTL

**Relatóriu Fundasaun Mahein Nia Hanoin ne'e suporta husi povu Amerikanu liu husi Ajénsia
Estadus Unidus ba Dezenvolvimentu Internasional (USAID)**

**Vizaun husi autor sira ne'ebé expresa iha publikasaun relatóriu sira ne'e la representa vizaun husi
Ajénsia Estadus Unidus ba Dezenvolvimentu Internasional (USAID)**

**Fundasaun Mahein (FM)
Website: www.fundasaunmahein.org**

2016



Kontiudu sira

Kontiudu sira	2
Sumariu ezekeativu	3
Introdusaun	5
Metodolojia	6
Tranzisaun lideransa iha luta FALINTIL	6
Tranzisaun lideransa Iha Faze ukun-an	8
Nomeasaun no ezonerasaun lideransa F-FDTL tinan 2016	12
Tratamentu ba militar reformadu	17
Tranzisaun estadu do homen ba estado de lei	18
Konkluzsaun	20
Rekomendasaun	21
Bibliografia	22



Sumariu Ezekutivu

1. FALINTIL – Forsa Defeza Timor-Leste (F-FDTL) hanesan instituisaun ida ne'ebé tuan liu eziste antes nasaun ne'e hamriik. Kestaun troka lideransa hanesan pratika natural dezde tempu luta armada nian, kontinua prosesu “tranzisaun lideransa” iha faze independensia nian laran. Lider masimu FALINTIL no F-FDTL nian rezigna-an husi kargu militar atu ezerse luan liu tan, sira nian kontribuisaun ba prosesu konstrusaun estadu hodi hari'i militar modernu ida, FALINTIL-FDTL ba defeza nasional hasoru ameasa externa.

2. Pratika tranzisaun lideransa militar ne'e hahu husi kedas FALINTIL nian ezistensia. Prosesu ida ne'ebé la'o iha mudansa oin-oin iha estrutura FALINTIL nian laran maka konserva forsa armada atu infrenta tempu ne'ebé defisil. Desizaun hotu militar nian normalmente submete ba estrutura komandu nia orientasaun. FALINTIL nia asaun maka fokus deit atu infrenta funu ho gerilla iha komandu nian orientasaun ne'ebé ikus liu halo despartidarizasaun no re-estruturasan FALINTIL, meius atu separa papel polítiku no militar nian durante tempu rezistensia.

3. Iha faze ukun-an nian husi inisiu independensia tranzisaun lideransa hatudu lider FALINTIL husik kargu militar ba vida polítiku. Prosesu ida ne'ebé la'os tuir proposta no lei formal nian tan lider FALINTIL ida husik kargu militar atraves liu husi rezignasaun. Hanesan Xanana Gusmão halo nune'e mos Taur Matan Ruak tuir. Wainhira Xanana Gusmão husik hela nia kargu militar nian ba iha kargu polítiku entaun akontese lakunas iha instituisaun FALINTIL. Momentu ida ne'eba, tempu maka obriga Xanana Gusmão tenke ba asume kargu polítiku para atu bele harii instituisaun FALINTIL. Xanana Gusmão husik kargu militar atu hamosu tranformasaun miltar gerilla FALINTIL ba F-FDTL ho forsa modernu ida ne'ebé hodi Taur Matan Ruak lidera.

4. Nune'e ohin leron tranzisaun lideransa militar tenke haktuir ona lei no estatutu militar nian. Governu tenki iha polítika ne'ebé diak ba rejenerasaun iha instituisaun militar nia laran. Sistema reforma ba membru F-FDTL importante tebes ba jerasaun foun kontinua dezenvolve forsa armada sai husi paradigma uluk nian. Forsa armadas F-FDTL tuir evolusaun militar modernu nia ne'ebé bele funu iha vila laran, professional iha servisu no atuasaun sira nune'e instituisaun bele impoin disiplina no regras militar nian. Militar sira ne'ebé reforma la ho kondisaun sei sai atensaun seriu ho problema pensaun sira ba veteranu ne'ebé sei sai kompleksu liu tan. Nune'e presiza atensaun maka'as husi Governu hamosu lei no polítika ida ne'ebé klaru hodi prosesu reinsersaun militar reformadus ho diak.

5. Rekomendasaun

- a. Rekomenda ba instituisaun orgaun soberania sira hanesan Governu, Prezidencia no Parlamentu Nasional atu hamosu komunikasaun ne'ebé diak atu ezerje desizaun ba futuru forsa armada F-FDTL tuir interdependensia Konstitusional orgaun soberania sira nian.



- b. Rekomenda ba lider F-FDTL liu-liu militar veteranu sira atu halo tuir lei hodi hakruk ba desizaun sivil.

- c. Rekomenda ba Governu liu husi Ministériu Defeza tenke seriu aplika polítika reforma militar ba pesoal F-FDTL ne'ebé tama ona ba idade reforma ho kondisaun no rekuiñesimentu espesial ba militar veterenu sira ne'ebé kontinua dedika-an iha instituisaun F-FDTL.



“Ba Forsa Armada, FALINTIL - Forsa Defeza Timor-Leste (F-FDTL), tranzisaun tenki halo, tranzisaun importante fó oportunidade ba sira seluk atu aplika nia sábedoria, testa ninia kapasidade, nia util ba nasaun ga la'e. I ha'u halo ida ne'e iha tinan 2011”. (Taur Matan Ruak)¹

“Ami husi jersaun tuan ami hanoin katak diak liu, tempu ita sei bele hanoin, tempu ita sei bele fó opiniaun, diak liu ita prepra jersaun foun, diak liu ita lori jersaun foun atu hare ba futuru ne'ebé do'ok, iha vizaun no iha misaun inklui misaun sira seluk atu lori nasaun ne'e ba dezvoltimentu ida ne'ebé real”. (Kay Rala Xanana Gusmão)²

Introdusaun

FALINTIL – Forsa Defeza Timor-Leste (F-FDTL) hanesan instituisaun ida ne'ebé tuan liu eziste antes Nasaun ne'e hamriik. Kestaun troka lideransa hanesan pratika natural dezde tempu luta armada nian, kontinua prosesu “tranzisaun lideransa”³ iha faze independensia nian laran. Lideransa superior FALINTIL no F-FDTL nian rezigna-an husik kargu militar atu ezerse luan liu tan sira nian kontribuisaun ba prosesu konstrusaun Estadu hodi hari'i militar modernu ida, FALINTIL-FDTL ba defeza nasional hasoru ameasa externa.

Troka lideransa ne'e buat ida prosesu natural,⁴ akontese iha tinan 2016 susesaun ba lideransa F-FDTL ho polêmika. Governu no Parlamentu Nasional ho Prezidente Repúblika iha haksesuk maka'as kona-bá konstitusionalidade no legalidade desizaun polítika ba empenamentu forsa armada. Troka lideransa hakat mos lakunas iha koordinasaun no komunikasaun, iha tendensia política, provoka mos tensaun sosial ho reazen kritikas husi organizasaun masa resistensia nian. Veteranu ativu sira iha F-FDTL afeita mos, ho problema dadaun ne'ebé la'o iha veteranu sira iha nivel polítika Timor-Leste, tratamentu ho dignu no kria kondisaun hodi re-intengra sira nia moris iha sociedade modernu ida.

Nune'e tranferensia lideransa atu fo oportunidade ba sira seluk atu infrenta, manan kbiit, manan esperensia atu hasai dezisaun ida ne'ebé hatudu sira bele, iha prosesu tranzisaun ida ne'e bele hamosu lider jersaun foun ba nasaun ida ne'e.⁵ Asuntu susesaun ba komandu F-FDTL husi

¹ Transkirsau Diskursu ba Nasaun Sua-Exelensia Presidente Republika Taur Matan Ruak Sobere Exonerasaun ba Major Jeneral Lere Anan Timur. Disponivel iha: <http://presidenciarepublica.tl/transkirsau-diskrusu-ba-nasaun-sua-exelensia-prezidente-republika-taur-matan-ruak-sobre-exonerasaun-ba-major-jeneral-lerre-anan-timur/>

² Gumão, Xanana (2015. Juñu) Entrevista husi Eis Ministru Negosiu Estranjeiru Indonezia, Dino Patti Djalal iha Programa Supermentor Berita Satu TV iha Indonezia. (2015. Juñu. 25) Disponivel iha: <https://www.youtube.com/watch?v=hfctrMPn-4A>

³ Tranzisaun lideransa husi política Timor-Leste nian adopta husi sorumutuk entre lider jersaun 75 liu husi insitiva Maubisse I no Maubisse II atu transforma ukun husi jersaun tuan ba jersaun foun atu kaer estafeta lidera nasaun ne'e ba futuru.

⁴ Transkirsau Diskursu ba Nasaun Sua-Exelensia Presidente Republika Taur Matan Ruak Sobere Exonerasaun ba Major Jeneral Lere Anan Timur. Disponivel iha: <http://presidenciarepublica.tl/transkirsau-diskrusu-ba-nasaun-sua-exelensia-prezidente-republika-taur-matan-ruak-sobre-exonerasaun-ba-major-jeneral-lerre-anan-timur>

⁵ Gusmão, Xanana (2014. Janeiro) Entrevista Especial Jornalista RTTL Alisia Benigna iha Programa Ita Nia Governu tinan 2014. Disponivel video iha: <https://www.youtube.com/watch?v=r23y6dR3o0s>



sistema ne'ebé FALINTIL adopta dezde luta rezistensia nian akontese, iha F-FDTL ne'ebé harii iha faze ukun-an tuir sistema militar modernu iha nasaun demokratiku, lei maka sai komandante ka matadalan ba dezisaun hotu estadu nian.

Relatoriu Fundasaun Mahein nian ne'e sei deskreve kona-bá prosesu tranzisaun lideransa ba dezvoltamentu forsa modernu ida nian no mos implikasaun husi tranzisaun lideransa militar ba dezvoltamentu instituisaun no militar sira. Parte dahuluk husi relatóriu ida ne'e, sei hato'o tranzisaun lideransa iha luta FALINTIL nian. Parte daruak pratika no lala'ok tranzisaun lideransa iha faze ukun-an. Parte datoluk sei esplika kona-bá nomeasaun no ezonerasaun lideransa F-FDTL ho polêmika. Parte dahat ko'alia kona-bá promosaun ba reforma no pensaun veteranu sira. Ikus liu konkluzaan no rekomendasaun.

Metodolojia

Fonte informasaun ka dados ba relatóriu ne'e rekolla maka dokumentu oficial sira hanesan, Konstituisaun Repúblika Demokratika Timor-Leste, Estatutu Organika FALINTIL-FDTL, Lei Promosaun Militar, Rejime ba Promosaun Oficial Jeneral sira ho Titular ba kargu A'as Militar nian, Dekretu Prezidente da Repúblika no dokumentu oficial sira, relatoriu dahuluk sira FM nia no opiniaun ka artigu sira liga asuntu troka lideransa F-FDTL. Nune'e mos halo entrevista pesoal ho intelektual Timor oan balun ne'ebé hanesan observador politika, justisa no siguransa nasional hodi konklui relatóriu ne'e liu husi metodu ne'ebé Fundasaun Mahein (FM) adopta maka Security Sector Discussion (SSD).

Tranzisaun lideransa iha luta FALINTIL

“Agora atu halo prova ka teste ba kapasidade husik nia halo. Ida ne'e maka ami liu husi ailaran ami aprende katak nia agora komandante pletaun kapas haruka sai ba komandante kompania haruka nia ba funu, funu querdijer ba para iha ne'ebá, nia hatudu.” (Xanana Gusmão)⁶

Inisiu FALINTIL ne'e hari'i nudar brasu armada partidu FRETILIN atu hala'o prosesu ida ba luta independensia. Ho prinsipiu libertasaun “patria” no libertasaun “povu” FALINTIL hakur prosesu naruk, iha mudansa oin-oin liu reforma lubun no teste barak iha estrutura FALINTIL. Troka lideransa depende ba tempu no situasaun maka determina dalabalu mos akontese promosaun muda tuir kbiit kapasidade ema ida serve iha militar ka polítiku tuir irarkia komandu nia orientasaun.⁷

Lider boot FALINTIL nian Xanana Gusmão fo sasin ba nia-an ne'ebé nia esklaresse iha dialogu ba polemika entre Mauk Moruk no Xanana Gusmão iha fulan Outubro 2013 iha CCD Dili.

⁶ Gusmão, Xanana (2014. Janeiro) Entrevista Espesial Jornalista RTTL Alisia Benigna iha Programa Ita Nia Governu tinan 2014. Disponival video iha: <https://www.youtube.com/watch?v=r23y6dR3o0s>

⁷ Gusmão, Xanana (2014. Janeiro) Entrevista Espesial Jornalista RTTL Alisia Benigna iha Programa Ita Nia Governu tinan 2014. Disponival video iha: <https://www.youtube.com/watch?v=r23y6dR3o0s>



Xanana Gusmão sempre hakruk la'ò tuir orden no orientasaun husi Comite Central FRETILIN (CCF) kolokadu ba iha ponta leste nu'udar responsabilidade espesial ba "Rejiaun de Gerilla". Xanana Gusmão halo aproximasaun ho kuadru polítiku no komandate militar sira atu re-organizaun atu involve ema hotu-hotu iha prosesu luta ida ne'e nian. Re-organizaun ida ne'ebé hamosu konseitu "unidade nasional", loke-an ba ema hotu, haree mos ba erru sira ne'ebé akontese iha ideolojia no polítiku, iha asuntu militar ne'ebé fundamental atu konserva forsa FALINTIL luta no involvimentu populasau sira nian halo FALINTIL bele tahan no reziste kleur.⁸

Ida duni diferensia ideia balun ne'ebé la konkorda hanoin ruma maibe lahasai dezisaun ida. Iha faze re-organizaun estrutura FALINTIL nian maka Chefe de Estado Maior Kilik Waiga'e no nia Vice Mauk Moruk aumezmu tempu Komandante Brigada Vermela, Ologari Asuwain II Komandante Birgada. Kolaborador Chefe Estado Maior das FALINTIL Taur Matan Ruak ho Sakinere ne'ebé mate setembru 1981 iha serku Aitana. Konferensia ne'e harii CRRN (Consellu Revolucionariu da Resistensia Nasional) Xanana hetan nia responsabilidade polítika no militar nu'udar Komandante em Chefe das FALINTIL.⁹

Re-estruturasaun ida ne'e hamosu reazen ho sitausaun sai manas liu tan, husi komandante lubun maka lakonkorda, iha ne'ebé sira nia pozisaun troka, Mauk Moruk fila fali mai vila, maibe tenki halo hodi haree ba konservasaun Força Armada nia ba funu naruk. Nune'e atu forsa sira bele hetan kbiit liu tan atu kontinua funu, iha reuniaun kuadru no komandante sira konkorda Xanana Gusmão asume Chefe Estado Maior, Taur Matan Ruak ba Vice Chefe Estado Maior kaer kontrolu no komandu fo kapasidade inisiativa tomak ba komandu kompañia sira atu reativa sira nia forsa hodi atakes inimigu. Ho susesu ne'ebé hatudu iha rezultadu diak Xanana Gusmão husik Chefe Estado Maior hodi intrega tomak ba Taur Matan Ruak la'ò to'ò funu remata.¹⁰

Nune'e pratika tranzisaun lideransa ne'ebé husi FALINTIL nian ezistensia tanba la'ò tempu ida ne'e defisil. Dezisaun hotu submete ba komandante to'ò dalaruma mos halo kotu tiha subordenasau entre militar no polítiku. Tempu rezistensia FALINTIL fokus deit atu inferenta funu ho gerilla iha komandu nian orientasaun ne'ebé ikus liu halo despartidarizasaun no re-estruturasaun FALINTIL, meius atu separa papel polítiku no militar nian durante tempu rezistensia nia akontese.¹¹

⁸ Gusmão, Xanana. (2013. Novembru). Intervensaun iha Dialogu ba Polemika Mauk Moruk Vs Xanana Gusmão iha Centro Convensaun Dili iha Novembru 2013. Disponivel iha <https://www.youtube.com/watch?v=aFV9iqzrvul>

⁹ Gusmão, Xanana. (2013. Novembru). Intervensaun iha dialogu ba Polemika Mauk Moruk Vs Xanana Gusmão iha Centro Convensaun Dili iha Novembru 2013. Disponivel iha <https://www.youtube.com/watch?v=aFV9iqzrvul>

¹⁰ Gusmão, Xanana. (2013. Novembru). Intervensaun iha dialogu ba Polemika Mauk Moruk Vs Xanana Gusmão iha Centro Convensaun Dili iha Novembru 2013. Disponivel iha <https://www.youtube.com/watch?v=aFV9iqzrvul>

¹¹ Taur Matan Ruak (2009. Agostu) Diskursu CEMG F-FDTL iha Aniversáriu ba Tinan 34 FALINTIL Nia Moris iha tinan 2009. Disponivel iha: <http://www.fundasaunmahein.org/2009/08/26/diskursu-cemg-f-fdtl-brigadeiro-taur-matan-ruak-aniversariu-ba-tinan-34-falintil-nia-moris-20-09/>



Tranzisaun lideransa Iha faze ukun-an

Iha faze ukun-an nian husi inisiu independensia tranzisaun lideransa hatudu lider FALINTIL husik kargu militar ba vida polítiku. Prosesu ida ne'ebé la'os tuir proposta no lei formal nian, talvez tempu maka obriga Xanana Gusmão tenke ba asume kargu polítiku otomatikamente reforma husi militar. Iha prosesu konstrusaun estadu la'o iha tranzisaun lideransa militar ho akontesimentu ida ne'ebé atraves husi prosesu ida rezignasaun.¹²

Lolos ohin loron tranzisaun lideransa militar tenke diferenti ona husi prosesu tranzisaun ida uluk nian, la liu ona husi rezignasaun maibe tuir regra no lei formal ne'ebé instituisaun adopta no aplika. Uluk lider FALINTIL ida husik kargu militar atraves liu husi rezignasaun. Hanesan Xanana Gusmão halo nune'e mos Taur Matan Ruak tuir. Kuandu Xanana Gusmão husik hela nia kargu militar nian ba iha kargu polítiku entaun akontese lakunas iha instituisaun FALINTIL. Momentu ida ne'eba, tempu maka obriga Xanana Gusmão tenki ba asume kargu polítiku para atu bele harii instituisaun FALINTIL. Xanana Gusmão husik kargu militar atu hamosu transformasaun miltar gerilla FALINTIL ba F-FDTL ho forsa modernu ida ne'ebé hodi Taur Matan Ruak lidera.

Iha tempu Taur Matan Ruak hakarak reforma husi vida militar, tuir dalan rezignasaun. Taur Matan Ruak tempu ne'eba nu'udar Brigadeiru General F-FDTL husu rezignasaun ba dala haat hakarak kompete iha vida polítika nian. Rezignasaun ida ne'e katak atu fo espasu ba promosaun tranzisaun lideransa iha estrutura militar F-FDTL nia laran. F-FDTL ne'ebé moris iha era independensia nia tuir evolusaun militar modernu atu hamosu lider jersaun foun husi F-FDTL nia rasik teste sira nia kapasidade no kbiit atu dezenvolve militar ida modernu.

Lider rezistencia sira bele ezerse sira nia direitu ativamente no kompete iha vida politika nian. Veterenu sira nian pepel importante tebes iha polítika nasaun nian atu kontinua fo sira nia kontribuisaun ida ne'ebé luan liu ba interese nasaun nian ne'ebé boot liu,¹³ problema sira kona-bá dezenvolvimentu nasaun nian no problema sira uluk nia labele tau todan ba jersaun foun sira. Sira veteranus sei labele iha espasu hadi'a nasaun ne'e ho misaun luta ailaran nian ne'ebé FALINTIL komunga liberta ona nasaun no libertasaun povu susar atu hadi'a wainhira sira sei kontinua serku ho regra no disiplina militar nian.¹⁴

Prosesu tranzisaun lideransa sai teste polítika ida ba prosesu transferensia husi jersaun tuan ba jersaun foun. Klasifikasaun ba lideransa polítika maka autor polítika jersaun tinan 1975 ne'ebé mai husi partidu polítiku sira tempu ne'eba nian.¹⁵ Atraves husi sorumutuk lider istoriku sira hafoin independensia Timor-Leste ho "Inisiativa Maubisse" atu buka dalan ba susesu

¹² Belo, Nelson. (2016. Abril 25). Observador Politika no Siguransa Nasional. Entrevista Pesoal.

¹³ Entrevista Especial Jornalista RTTL, Alisia Benigna ho PM Xanana Gusmão, iha 23 Janeiro 2014. Disponival video iha: <https://www.youtube.com/watch?v=r23y6dR3o0s>

¹⁴ Belo, Nelson. (2016. Abril 25). Observador Politika no Siguransa Nasional. Entrevista Pesoal.

¹⁵ Freitas. Antonio. (2016. Abril. 04). Observador ba Asuntu Estratejiku no Relasaun Internasional. Entrevista Pesoal.



tranzisaun. Tanba situasaun krize 2006 nu'udar konfliktu de jersaun entaun lider sira buka meius ba susesaun lideransa, iha problema iha *estatus quo* sei domina prosesu tranzisaun jersasional ne'e sei hasoru obstaklu susesaun lideransa nian.¹⁶ Lider sira husik kargu ofisial estadu nian la'os rezigna-an husi prosesu polítiku no sira nia influênsia sei maka'as tebes iha prosesu foti dezisaun estadu nian.¹⁷

Iha kontestu ida ne'e prosesu tranzisaun lideransa akontese iha faze ukun-an nian laran. Lolos ne'e tenki la'o tuir ona regra no lei sira aplika dadaun ona no promosaun bele akontese tuir kbiit kapasidade no esperiensa ne'ebé sira hetan iha kursu no pratika sira. Entaun hatudu trafiku iha promosaun lideransa tanba lala'ok ida husi tranzisaun ho dalan rezignasaun ne'e depende ema nia vontade la'os obrigatoriu ka tuir lei.

a. Tranzisaun forsa gerillia ba forsa modernu

Hafoin independensia Timor-Leste nian, Kay Rala Xanana Gusmão nu'udar Komandante Em Chefe FALINTIL husik kargu superior militar ba vida sivil sa'e ba Prezidente Repúblika. Pratika tranzisaun lideransa ida ne'ebé inisiu kedas husi forsas armadas. Dalaruma tanba nasaun ida ne'ebé foin hamri'ik presiza duni lider sira ne'ebé mai husi luta rezistensia nian. Taur Matan Ruak segundu lider FALINTIL asume nu'udar lideransa forsas armadas tempu independensia ne'ebé promove ba Brigadeiru General. Lider FALINTIL sira ne'ebé husik kargu militar ba vida sivil. Tanba sira sira hakarak servi liu dalan polítiku atu kompleta sira nia misaun luta nian, ho kapasidade luta nian utiliza atu rezolve problema sira ne'ebé iha no mos atu hadi'a nasaun ida ne'e.¹⁸

Prosesu tranformasaun forsas armadas atu tuir evolusaun militar modernu nian ne'ebé forsa defeza F-FDTL moris iha faze ukun-an nia. Faze ida ne'ebé hakfilak militar kombattente sira ba forsa defeza nasional F-FDTL. Pratika tranzisaun faze ukun-an nia hahu inisiu F-FDTL iha Aileu. Modernizasaun vizaun militar sai tiha polêmika bo'ot, FALINTIL barak deskontente, no Elle Sette (L-7) eventualmente abandona tiha husi akontanamentu Aileu ho membru hirak seluk reforma automatikamente husi vida militar. FALINTIL kuaze ema 2000 maka konsentrasaun iha akontanamentu Aileu, ema na'in 650 deit maka sai membru F-FDTL iha tinan 2001.¹⁹

Transformasaun FALINTIL ba F-FDTL atu sai forsa defeza ida ne'ebé modernu no professional husik paradigma tuan. Forsa defeza ida ne'ebé bele hasoru funu iha eskritoriu laran ne'ebé hakruk ba lei no regulamentu oin-oin no respeito ba direitus umanus. Iha kbiit atu garante

¹⁶ Bendito, Antei. (2016. Abril.07). Dosenti Politika UNTL. Entrevista Pesoal.

¹⁷ Belo, Nelson. (2014). Rezignasaun Xanana Gusmão Nian: Signifika Saida Los? Disponivel iha: <http://www.topotimor.com/opiniaun/rezignasaun-xanana-gusmao-nian-signifika-saida-los>

¹⁸ Guterres, Frei. (2016. April.08). Xefi Kasa Militar. Entrevista Pesoal.

¹⁹ Fundasaun Mahein (2011. Marsu. 23). Veternu sira Timor-Leste dezde Krize 2006 Nian. Disponivel iha: http://www.fundasaunmahein.org/wp-content/uploads/2011/03/veterans-in-tl-since-2006-crisis-23-marcu_2011- tetum2.pdf



independensia nasional, integridade teritoriu no asegura liberdade ba populasaun husi ameasa externa.²⁰

Maske nune'e prosesu ida ne'e mos la'o husik lakunas iha instituisaun F-FDTL nia laran. FALINTIL lubuk maka dezmobiliza no reforma automatikamente ba vida sivil ho total hamutuk ema 1,308. UNTAET sira ho politika ida atu FALINTIL la bele sai problema liu husi Programa Reinsersaun no Asistencia Sosial (PRAF) ne'ebé fornese kursu no osan reintegrasaun US\$ 100 kada ema durante fulan 11.²¹ Grupu oin-oin hari'i ho simbolu rezistencia no marsa ho farda militar tempu komemorasaun loran nasional sira. Problema veteranu sai problema ida ne'e kompleksu no boot tebe-tebes atu estadu rezolve sedu susar, iha problema ida ne'ebé dadaun kontinua iha situasan politika Timor-Leste nian.

Transformasaun ukun ne'e kontinua la'o ho klima ne'ebé diak, tranzisaun ida ne'ebé laiha transparansia ho kriteria ne'ebé rigoroza sei problematiku. Tempu independensia aplika dadaun ona tranzisaun ida ne'ebé la'o tuir ona ho lei no regulamentu sira no funcionamentu orgaun ka instituisaun kompotente sira ba prosesu tranzisaun ne'ebé akontese.²²

b. Tranzisaun lideransa politiku

"Hau hare katak ita presiza no nasaun presiza atu prepara nova jersaun i nova jersaun ne'e katak ami be velha jersaun ne'e mos hare ona hatene ona katak ami nia tempu too iha ne'ebé. Sei ita laprepara jersaun ida ne'ebé atu mai kaer tuir, dala ruma ita bele hakfodak ho buat sira ne'e hotu" (Kay Rala Xanana Gusmão)²³

Iha tinan 2014 nian rohan Lider boot FALINTIL nian Xanana Gusmão rezigna-an husi kargu politiku Primeiru Ministru. Rezignasaun ida ne'ebé antes ne'e hamosu polêmika no pro-kontra iha públiku. Hamosu opiniaun sala ho razaun estabilidade nasional tanba hatudu tranzisaun ba jersaun foun ho susesu. Iha antes ne'ebé provoka deklarasaun lubuk ida husi organizaun rezistencia, Veteranu, Kaixa Klandestina no Partidu CNRT rasik husu Komandante Em Chefe Kay Rala Xanana Gusmão mantein kargu to'o mandatu remata.

Rezignasaun akontese depois CNRT prezide kongresu extraordinariu ba planu rezignasaun ho desizaun konsensu husi Partidu CNRT. Iha ne'ebé Xanana Gusmão hili Rui Maria Araujo sai susesaun ba kargu Primeiru Ministru ho Governasaun ba periodu 2015 to'o 2017. Mudansa lubuk akontese ho remodelasaun estruktural Governu forma hamosu VI Governu Konstitusional. Transferensia lideransa ba jersaun foun la'os *fullpower*, liu husi prezensa lider boot Marii

²⁰ Konstituisaun RDTL 2002. Artigu 146 kona-bá forsa armada.

²¹ Fundasaun Mahein (2011. Marsu. 23). Veternu sira Timor-Leste dezde Krize 2006 Nian. Disponivel iha: http://www.fundasaunmahein.org/wp-content/uploads/2011/03/veterans-in-tl-since-2006-crisis-23-marcu_2011-tetum2.pdf

²² Belo, Nelson. (2016. Abril 25). Observador Politika no Siguransa Nasional. Entrevista Pesoad.

²³ Entrevista Espesial Jornalista RTTL, Alisia Benigna ho PM Xanana Gusmão, iha 23 Janeiro 2014. Disponival video iha: <https://www.youtube.com/watch?v=r23y6dR3o0s>



Alkatiri no Xanana Gusmão iha Governu atu garantia komunikasaun instrumentu Governante ninia. Oin seluk husi lider na'in rua ne'e nia fo presauun polítika ne'ebé todan ba dezisaun Governante nian, Primeiru Ministru Rui Maria Araujo hanesan jersaun foun ida.²⁴

Nune'e rezignasaun ne'e ho intensaun halo tranzisaun lideransa husi jersaun tuan ba jersaun foun atu prepara-an. Hanesan Sekretariu Jeral Partidu CNRT hateten:

“Rezignasaun PM Xanana Gusmão ne'e hanesan dezisaun ida ne'ebé ho intensaun atu prepara lideransa foun atu bele lori pais ne'e sai husi siklu ida ne'ebé ita konsidera hanesan jersaun tuan ne'e fo sira nia dezempenu tomak ba pais ida ne'e durante 40 anos ona, mos respeita tanba natureza i tanba ne'e maka lideransa foun tenki prepara”²⁵

Mudansa natural sira ne'ebé la'o iha forsas armadas ne'e maka dalaruma implika ba prosesu polítika rai laran no mos sai kontraditoriu. Hanesan nasaun foin sai husi konfliktu ho problema oin-oin no problema veterenu maka kompleksu. Veternus sira nia reazen iha dezisaun sira kona-bá troka lideransa hatudu problema ne'ebé dadauk la'o kona-bá oinsa trata veteranu hotu-hotu ho dignu no fornese kondisaun ba sira nia pozisaun moris iha sosiedade ida ne'ebé modernu. Iha F-FDTL nia laran, susar atu hakaben entre veterenu FALINTIL no forsa modernu sira ne'ebé bele trasa fila-fali lala'ok ba formasaun kona-bá F-FDTL iha loron Fevereiru 2001, wainhira eis-kombatente forsa FALINTIL 650 hili hodi hetan formasaun ba iha forsa modernu nian, no 1300 ne'ebé halo kontroversiadu desmobiliza no hasai tiha.²⁶

Lisaun hatudu iha situasaun balun ne'ebé mosu husi forsa armada nian laran, afeita ba koezaun sosial no polítika. Situasaun ida ne'ebé lori nasaun ne'e ho comunidade internasional sira indika Timor-Leste estadu frajil iha tempu krize la'o dadaun. Iha disturbasaun maka'as ba seguransa nasional inisu husi problema petisaun mosu iha forsa armada nian laran, to'o iha tendensia poliítica ne'ebé halo estrutura seguransa rahun. Nune'e prezisa transforma konfliktu jersaun ba susesu de jersaun, atu hamosu lider foun husi jersaun foun nian iha instituisaun militar no mos sivil nian. Lider jersaun foun ida ne'ebé mosu ho figura kapasidade, la'os ona figura funu na'in ka veteranu, maibe figura jersaun foun ida ne'ebé bele asegura estabilidade nasional no estabilidade Governativa nian.²⁷

²⁴ Freitas. Antonio. (2016. Abril. 04). Observador ba Asuntu Estratejiku no Relasaun Internasional. Entrevista Pesoad.

²⁵ Babo Soares, Deonísio. (2014). Sec. Jeral Partidu CNRT. Apresentasau iha Debate kona-bá Rezignasaun Xanana Gusmão husi kargu Primeiru Ministru iha Hotel Timor 2014. Disponivel iha: <https://www.youtube.com/watch?v=T4enKvRBux0>)

²⁶ Fundasaun Mahein (2016. Abril. 29). Governasaun ne'ebé Mukit: Oinsa Prevene Polemika kona-bá Lideransa F-FDTL. Mahein Nia LianNú 110. Disponivel iha: http://www.fundasaunmahein.org/wp-content/uploads/2016/04/MNL_Nu.-110_29042016_pdf.pdf

²⁷ Cansio Freitas, João. (2014). Eis Mlnstru Edukasaun. Intervensaun iha Debate kona-bá Rezignasaun Xanana Gusmão husi kargu Primeiru Ministru tinan 2014. <https://www.youtube.com/watch?v=T4enKvRBux0>



Nomeasaun no ezonerasaun lideransa F-FDTL tinan 2016

“Problema mudansa estrutura ne’e tenki la’o duni no iha tempu ida estrutura iha F-FDTL ne’e tenki troka, maibe atu troka ne’e maka tenki la’o ninia prosesu ida ne’e maka akontese hela ba problema ezonerasaun ne’e.” (Falur Rate La’ek)²⁸

Dezisaun ba nomeasaun no ezenorasaun lori to’o ba dezide iha Tribunal Rekursu maibe laiha solusaun ba susesaun lideransa F-FDTL ba proposta primeiru. Governu hamosu fali proposta foun ho pakote rua. (1) Halo nomeasaun fila-fali ka rekondusaun ba CEMG F-FDTL atuál ne’ebé hato’o (no rejaita) antes ne’e; ka (2) nomeia Donaciano Gomes “Pedro Klamar Fuik” (Kapitaun ba Tasi no Funu) ne’ebé asumi CEMG F-FDTL no Koronel Calisto Dos Santos “Coliati” (Adidu Defeza atual Timor-Leste nian iha Canberra) ne’ebé asumi papel hanesan Vice-CEMG F-FDTL nian. Pakote segundu ne’ebé Prezidente Repúblika asina reprezenta jersaun foun sira ne’ebé liga ba estatutu forsa armada, militar sira ne’ebé tama ona ba idade 60 obrigatoriu hetan reforma.

Akontese tranzisaun ne’e hatudu Prezidente Repúblika nia asaun kumpri dezisaun tranzitoriu politika ne’e aplika dadaun rejerasaun ba forsa armada nia lideransa. Tranzisaun jersasional gradual reforma veteranu sira iha F-FDTL nian laran tranzisaun ida ne’ebé la’os konsensu maibe tuir lei formal no regra normal sira ne’ebé adopta. Tranzisaun ida ne’ebé tenke ho kbiit no kapasidade tékniku no matenek ne’ebé iha jersaun foun F-FDTL nian sai luta foun ida iha instituisaun forsa modernu nian. Iha nasaun independensia ida nian ema hotu tenke la’o tuir regra no lei, konstituisaun maka sai matan dalan atu ema hotu la’o tuir atu organiza ita nia moris iha sosiedade modernu ida.²⁹ Tranzisaun jersasional gradualmente ida ne’ebé aplika iha instituisaun militar mos bele aplika iha politiku sivil nian.

Nomeasaun no ezonerasaun simu reazen oin seluk no sai tiha problematiku. Governu ho Presidencia no Parlamentu Nasional hamosu haksasuk ida, iha prosesu troka lideransa F-FDTL, latuir duni ka lae legalidade konstitusional no regras normal sira kona-bá empenamentu ba lideransa forsa armadas. Polítiku sira finzi hamosu polêmika no haksasuk ida kona-bá susesaun lideransa F-FDTL,³⁰ lahare nia pontu pozitivu no dalaruma sira la akompañia dezvoltamentu forsa armadas. Dominasaun polítika ba asuntu militar nia bele provoka mentalidade militar sira, oinsa iha sinal konfiansa ne’ebé forte iha irarkia militar nian laran. Hanesan Prezidente Repúblika hateten susesaun lideransa F-FDTL hanesan tranzisaun jersasional ida atu hametin institusiona forsas armadas F-FDTL ba oin no bele iha sinál konfiansa ida ne’ebé forte iha instituisaun militar no mós iha militar sira, liu husi tranzisaun ida ne’ebé gradual.³¹

²⁸ Jornal Nasional Diariu, Edisaun Iorn 04 Marsu 2016.

²⁹ Boavida, João. Diretúr Ezekutivu CEPAD. (2016. Abril. 19). Entrevista Pesoal.

³⁰ Fidelis Leite Magalhaes. (2016. Fevereiro). Disponivel iha: <http://fidelismagalhaes.blogspot.com/>

³¹ Komunikadu Imprensa husi Palasiu Presidencia (2016. Abril.15) disponivel iha: <http://presidenciarepublica.tl/4896-2/>



Oinsa bele haburas konfiansa ne'ebé iha militar no insituisaun forsa armada rasik kaer metin? Lideransa veterenu ativu iha instituisaun militar lasai ezemplu diak husik atu hakruk ba regra no lei, hetok ho politiku sira nian asaun sira ne'ebé hatudu iha kazu nomeasaun CEMGFA. Ida ne'ebé hatudu Governu lori proposta foun ho opsaun rua ba Prezidente Repúblika atu foti dezisaun. Prezidente Repúblika hili opsaun segundu ne'ebé reprezenta jerasaun foun F-FDTL Donaciano Gomes "Pedro Klamar Fuik" ho Calistro Dos Santos "Coliati" ne'ebé Governu rasik porpoin Prezidente deside. Governu halo finji deklarara liu husi Prezidente Konsellu Ministru Agio Pereira katak no fim Governu ho Prezidente da Repúblika konkorda malu. Maibe depois husi kotuk Ministru defeza deklarara fali katak opsaun segundu ne'e nu'udar opsaun rezerva no Governu mantein opsaun rekondusaun.³² Ikus mai dezisaun sira la'o tuir elitus sira nia hakarak ne'ebé sira eskolla no lei seidauk sai komandante.

a. Proposta, promosaun no nomeasaun

Kompetensia atu halo promosaun ofisial jeneral ho ofisiais jerais sira tuir artigu 1, Rejime Promosaun Ofisial Jeneral ba Kargu A'as Militar; Prezidente Repúblika maka iha kompetensia exkluzivu atu halo promosaun ba militar F-FDTL nian, ba postu ofisial jeneral ho ofisiais jenerais sira ho poposta husi Konsellu Ministru. Proposta konsellu Ministru nian tenki fundamenta ho ofisial ida deit tuir alinea 3) husi Artigu 2, Rejime Promosaun Ofisial Jeneral ba Kargu A'as Militar haktuir:

"Proposta Konsellu Ministru nian konsiente ho dezinasaun, fundamentada, ba ofisial ida, entre sira ne'ebé maka membru Governu responsavel ba area defeza indika"

Enkuantu Vice CEMG F-FDTL nomea no ezenora husi Prezidente Repúblika, liu husi proposta Governu nian, konsulta uluk ho CEMG F-FDTL.³³ Nune'e mos iha lei Rejime Promosaun Ofisial Jeneral ba Kargu A'as Militar, artigu 4 kona-bá nomeasaun no ezonerasaun ba komandante sira komponente nian ho Chefe Estado Maior nian:

Komandante sira komponente no CEM F-FDTL nian nomeadu no ezoneradu husi membru Governu ne'ebé iha kompetensia ba area defeza nasional nian, ho proposta husi CEMG F-FDTL, hafoin rona uluk Konsellu Superior Defeza Militar.³⁴

Asuntu troka lideransa F-FDTL proposta propoin ema nai rua ka tolu iha kada pakote, iha ne'ebé mantein rekondusaun lideransa F-FDTL CEMG F-FDTL Lere Anan Timur no Filomeno Paixão ba Vice CEMG F-FDTL no pakote seluk Governu propoin Donaciano Gomes "Pedro Klamar Fuik" (Kapitaun ba Tasi no Funu) ba CEMG F-FDTL no Koronel Calisto Dos Santos "Coliati" (Adidu Defeza atual Timor-Leste nian iha Canberra) ba Vice CEMG F-FDTL nu'udar pakote alternativu

³² Governu Mantein Lere ho Filomeno Paixão. Disponivel iha:

<http://www.jndiario.com/2016/04/27/governu-mantein-lere-ho-filomeno/>

³³ Artigu 9 alinea 2 kona-ba vice CEMG F-FDTL nian, Estatutu Organika FALINTIL-FDTL, dekretu Lei Nú 15/ 2006.

³⁴ Dekretu Lei Nú 32/2009, Ioron 25 Novembru, Rejime ba Promosaun Ofisial, Jeneral sira ho Titlu ba Kargu a'as Militar nian.



ne'ebé Prezidente Repúblika aseita troka lideransa F-FDTL. Proposta husi Governu ne'ebé responsavel ba suntu defeza militar partikularmente Ministru Defeza.

Governu liu husi Ministru Defeza so bele inklui deit ofisial sira ne'ebé satisfas kondisaun jeral ho espesial maka bele asesu ba postu jeneral. Hatuir alinea 4, rejime ba promosaun ofisial, jeneral sira ho titlu ba kargu a'as militar nian kona-bá kondisaun jeral maka hanesan a) Kumprimentu ba dever sira militar nian; b) Kurríkulu exelente hanesan militar, ne'ebé hatudu mos ezersisiu ho efisiénsia i efikásia ba funsaun sira iha ninia postu; c) qualidade no kapasidade pesoal, intelektual ho professional, ne'ebé postu imediatu ne'e rekere, hodi hatudu, integridade, karakter, qualidade serbisu nian ho aseitabilidade husi ninia par sira.³⁵

Enkuantu husi kondisaun espesial ne'ebé ofisial ida priense atu asesu ba postu jeneral tuir alinea 6) relata; a) tempu minimu tinan ida iha postu koronel, iha modalidade promosaun husi eskolla no nomeasaun; b) Akaba tiha ona, ho aproveitamentu, kursu jeneral, nian iha Timor-Leste ka iha pais ida ne'ebé eziste relasaun koperasaun tékniku-militar; c) Experensia nu'udar ofisial nomeadu ba ezersisiu ho relevansia ba kargu, misaun ho serbisu oin-oin; d) kaer medalla sira ne'ebé atribuidu tanba meritu ho bravura pesoal; e) Kaer grau akademiku, ne'ebé bele valorize ho orden conforme ninia importansia,³⁶

b. Regra no kriteria ba asesu postu jeneral

“Etapa tranzisaun ukun ne'e ita tama ona ba dezenvolvimentu, sei ita lakria militar profesional ne'e ita lakria lei no orden” (Nelson Belo)

Nomeasaun no ezonerasaun CEMGFA ne'e hatudu atu forma forsa modernu atraves regras no kriteira normal ne'ebé maka nasaun adapta iha lei sira ba forsa armada F-FDTL nian. Uluk la'o ho prosesu ida agora diferente, tranzisaun tenki la'o tuir regras no lei. Aplika iha prosesu ida transparansia bele haree ema hotu fo opiniaun. La hatudu involvimentu Parlamentu Nasional iha prosesu troka lideransa F-FDTL, halo estudu avalisaun atu satisfas detallu sira ba asesu postu jeneral nian.³⁷ Tanba minimu rekursu iha F-FDTL tranzisaun ne'ebé akontese para fo espasu no promosaun ba militar jersaun foun sira.³⁸ Transformasaun ne'ebé la'o ona iha vizaun forsa modernu intermus konseitu, substansia no dutrina militar. Aplika dadaun ona tranzisaun no reforma militar ho prosesu gradual tuir etapa iha estrutura militar lideransa militar nova jersaun nian.³⁹

³⁵ Dekretu Lei Nú 32/2009, loron 25 Novembru, Rejime ba Promosaun Ofisial, Jeneral sira ho Titlu ba Kargu a'as Militar nian.

³⁶ Dekretu Lei Nú 32/2009, loron 25 Novembru, Rejime ba Promosaun Ofisial, Jeneral sira ho Titlu ba Kargu a'as Militar nian.

³⁷ Belo, Nelson. (2016. Abril. 25). Observador Politika no Siguransa Nasional. Entrevista Pesoal.

³⁸ Guterres, Frei. (2016. April.08). Xefi Kasa Militar. Entrevista Pesoal.

³⁹ Freitas. Antonio. (2016. Abril. 04). Observador ba Asuntu Estratejiku no Relasaun Internasional. Entrevista Pesoal.



Aplikasaun polítika maka maka'as liu duke lei dalaruma tanba lei no estatutu formal sei la'o iha lakunas. Konstituisaun rasik laklaru kona-bá se maka iha kompetensia dehan deit rona husi Governu no halo nomeasaun. Iha estatutu forsas armadas nian provizaun balun ne'e maka fo fatin iha kazu exepcional ona Prezidente Repúblika uza ninia kompetensia rasik atu foti dezisaun ruma. Instituisaun relevante sira ne'ebé iha kompetensia lahare didiak problema sira ne'e atu ultrapasa dezisaun ida susesaun lideransa F-FDTL.⁴⁰

Tranzisaun lideransa ne'ebé normalmente bele akontese tuir nesesidade militar nian. Laiha lei ida ne'ebé hateten dehan brigadeiru ida tun ida sai fali, ida ne'ebé bolu dehan regra la formal ka lei trandisaun militar (*Military Customery law*) ne'ebé adopta husi instituisaun militar iha mundu adopta. Iha asuntu ida ne'e tanba sistema komandu entaun irarkia deviza militar maka manda, maibe tanba komprensaun mikit husi sivil bele akontese oin seluk tiha.⁴¹

Tranzisaun lideransa ida ne'e atu hamosu estafeta ba lideransa iha F-FDTL liu husi tradisaun foun, promove lideransa nivel altus iha F-FDTL to'o iha kareira a'as antes husik instituisaun F-FDTL. Militar ne'e instituisaun forte ne'ebé iha ona nian kaderizasaun rasik. Revitalizasaun ba instituisaun F-FDTL hola parte iha reforma no bele fo iis ba instituisaun militar ne'e bele book-an. maibe ho forsa polítiku boot ida hanesan veteranu dalabalu sala utiliza ba iha interese polítiku sira nian.

c. *Relasaun sivil militar*

Dezisaun ikus ba dezide proposta rua ne'ebé Governu propoin no Prezidente Repúblika aprova. Parte rua Ezekutivu no Presidencia hatudu laiha konsensu ida iha dezisaun susesaun lideransa ne'e, maibe kontinua ho tendensia polítika iha solusaun ikus troka lideransa F-FDTL. Situasaun ida ne'e bele hamosu tensaun, daet ba veteranu sira, rede klandestina, movimentu rezistensia no bele mos afeita ba instituisaun F-FDTL nian laran.⁴²

Forsa armada F-FDTL obdese ba orgaun suberania kompotente sira, tuir Konstituisaun ho lei, no insere sira nia-an iha administrasaun direta Estadu nian, liu husi Ministériu Defeza.⁴³ Orgaun superior estadu hirak ne'e responsavel defeza no nasional ba F-FDTL maka: a) Prezidente Repúblika; b) Parlamentu Nasional; c) Governu; Chefe Estadu Maior General F-FDTL.⁴⁴ Iha kazu troka lideransa F-FDTL afeita iha komunikasaun sivil militar, iha separasaun poder ne'ebé klaru la'o oin seluk iha pratika ne'ebé hatudu orgaun suberanu legislativu no ezekutivu sai ida deit fali hasoru Prezidencia no dala balu voz ativu ne'e lolos iha Parlamentu Nasional iha fali ezekutivu.⁴⁵

⁴⁰ Oliveira Sampaio, Luis. (2016. Abril. 05). Diretúr ezekutivu JSMP. Entrevista Pesoal.

⁴¹ Freitas. Antonio. (2016. Abril. 04). Observador ba Asuntu Estratejiku no Relasaun Internasional. Entrevista Pesoal.

⁴² Boavida, João. (2016. Abril. 19). Diretúr Ezekutivu CEPAD. Entrevista Pesoal.

⁴³ Artigu 3 Kona-ba Integrasaun iha Administrasaun Estadu nian, Estatutu Organika FALINTIL-FDTL, dekretu Lei Nú 15/2006.

⁴⁴ Artigu 4 Kona-ba Orgaun Superior sira Responsavel ba Defeza no F-FDTL, Estatutu Organika FALINTIL-FDTL, dekretu Lei Nú 15/2006.

⁴⁵ Boavida, João. (2016. Abril. 19). Diretúr Ezekutivu CEPAD. Entrevista Pesoal.



Susesaun ba lideransa F-FDTL iha falta komunikasaun efektivu no koordenasaun diak entre orgaun soberanu sira. Tuir regra komunikasaun formal ne'ebé adopta asuntu defeza militar nian, nomesaun ho ezonerasaun CEMG F-FDTL no vice CEMG F-FDTL husi Presidente Repúblika ho proposta husi Governu hafoin iha audensia ho Konsellu Superior Defeza Militar ho Konsellu Superior Defeza no Seguransa liu husi membru Governu ne'ebé kaer materia defeza nasional nian,⁴⁶ lakonsege indentifika lakunas sira iha lei no regra sira instituisaun militar nian.⁴⁷

Kestaun troka lideransa F-FDTL sai presedente ida ba futuru. Husi komunikasaun polítiku ne'ebé hatudu, polítika maka la'o duke aplika lei ne'ebé la'o oituan deit. Politizasaun ba asuntu militar hamosu psikolojiku militar hodi impata modernizasaun vizaun militar ba futuru.⁴⁸ Polítiku sira husik hela lisaun ida ne'ebé sei konsume husi jersaun ba jersaun, hatudu mos katak fortifika kultura polítika ne'ebé Forsa Armada kontinua nafatin submete ba dezisaun polítika husi poder sivil ka supermasaun sivil nian. Sei kria sivilizasaun iha sosiedade nia leet katak poder kona-bá *check and balance* ne'e la'o iha nia pratika duni.⁴⁹

Lei estatutu forsa armada nian, komandante komponente sira ne'e to'o tinan rua deit ba mandatu rua tinan haat deit.⁵⁰ Nune'e tenke reforma no labele sa'e tan, tanba laiha dalan. Iha rekursu forsa ne'ebé minimu susar atu implementa ida ne'e lei ne'ebé la kondis ho Timor-Leste nia natureza. Lolos Governu tenke muda uluk lei para bele iha espasu.⁵¹ Instituisaun sei la'o ho tranzisaun gradual hanesan gia tranzitoriu ne'ebé instituisaun militar adopta atu bele aplika kursu jeneral nian ne'ebé militar sira kondisiona.⁵² Lolos troka lideransa ne'e la sai polémika. Polítiku sira lakohi buka hatene uluk natureza tranzisaun ne'e akontese iha instituisaun forsa armada.⁵³ Tranzisaun ida radikal ka gradual ne'e sei la afeita kualker prosesu troka lideransa iha F-FDTL maibe hatudu ikus laiha konsensu iha dezisaun troka Komandante F-FDTL ne'e.⁵⁴

⁴⁶ Artigu 3 kona-ba Nomeasaun ho Ezonerasaun Chefe ho Vice CEMG F-FDTL, Rejime ba Promosaun Ofisial Jeneral sira ho Titular ba Kargu A'as Militar nian. Dekretu Lei Nú 32/2009, Loron 25 Novembru.

⁴⁷ Oliveira Sampaio, Luis. (2016. Abril. 05). Diretúr Ezekutivu JSMP. Entrevista Pesoal.

⁴⁸ Freitas. Antonio. (2016. Abril. 04). Observador ba Asuntu Estratejiku no Relasaun Internasional. Entrevista Pesoal.

⁴⁹ Fundasaun Mahein. (2016 .Fevereiro. 23). Proposta Nomeasaun no Exonerasaun Polémika entre Presidente da Repúblika ho Governu RDTL. Mahein Nia Lian Nú. 108. Pdf. Disponivel iha: http://www.fundasaunmahein.org/wp-content/uploads/2016/02/MNL-Nu.108_Proposta-Nomeasaun-no-Exonerasun-23022016_Versaun-Tetum.pdf

⁵⁰ Fundasaun Mahein. (2016 .Fevereiro. 23). Proposta Nomeasaun no Exonerasaun Polémika entre Presidente da Repúblika ho Governu RDTL. Mahein Nia Lian Nú. 108. Pdf. Disponivel iha: http://www.fundasaunmahein.org/wp-content/uploads/2016/02/MNL-Nu.108_Proposta-Nomeasaun-no-Exonerasun-23022016_Versaun-Tetum.pdf

⁵¹ Oliveira Sampaio, Luis. (2016. Abril. 05). Diretúr ezekutivu JSMP. Entrevista Pesoal.

⁵² Freitas. Antonio. (2016. Abril. 04). Observador ba Asuntu Estratejiku no Relasaun Internasional. Entrevista Pesoal.

⁵³ Guterres, Frei. (2016. April.08). Xefi Kasa Militar. Entrevista Pesoal.

⁵⁴ Boavida, João. (2016. Abril. 19) Diretúr Ezekutivu CEPAD. Entrevista Pesoal.



Tratamentu ba militar reformadu

Kestaun sira iha FALINTIL-FDTL nia laran ligasaun ho reforma. Lala'ok reforma sira iha F-FDTL tuir lei estatuta militar nian haruka. Membru militar sira ne'ebé ho pasa ona idade 60 ba leten tenkie tama ba reforma. Mudansa iha Instituisaun F-FDTL ne'e sei iha implikasaun ba veteranus sira ativu mos sei reforma.

Hanesan pratika sira ne'ebé aplika dadauk reforma militar veteranu sira maka ho idade reforma hetan promosaun onorífika nu'udar simbolu rekuiñesimentu ba dedikasaun tomak durante iha instituisaun F-FDTL. Rekuiñesimentu ba militar reformadu ladun klaru husi militár veteranu sira ne'ebé funu ailaran depois kontinua iha F-FDTL to'o reforma. Prosesu reforma dadun ne'e aplika deit ba soldadu no ofisial, kargu superior sira laregula ho lei no sai tiha problematiku wainhira troka kargu estrutura lideransa F-FDTL tinan 2016. Lakunas iha dezisaun polítika no mos lei ka estatutu militar lahare didiak husi autoridade sivil liu-liu Ministru Defeza ne'e bele hamosu reforma ho problema ne'ebé kompleksu iha futuru.⁵⁵

Nune'e tranzisaun lideransa ida ne'ebé tenki tuir lei no estatutu militar nian. Sistema reforma ba membru F-FDTL importante tebes ba jersaun foun kontinua dezenvolve forsa armada sai husi paradigma uluk nian. Forsa armadas F-FDTL tuir evolusaun militar modernu nia atu hasoru funu iha vila laran, funu iha eskritoriu laran,⁵⁶ ne'ebé instituisaun bele impoin disiplina no regras militar nia ba membru sira.⁵⁷ Militár sira ne'ebé reforma la ho kondisional sei sai atensaun seriu ho problema pensaun sira ba veteranu ne'ebé sei sai kompleksu liu tan. Militar veteranu reforma sira ho nia pasadu ne'ebé husi partidu polítiku sei exerse nia direitu hodi partisipa ativamente iha polítika. F-FDTL reformadu balun hato'o ona preokupasaun oin-oin katak sira la seguru iha vida sivil no seidak iha lei ne'ebé garante sira nia re-integrasaun ne'e.⁵⁸ Iha ne'ebé definisaun lei no polítika ne'ebé laklaru sai problema boot.⁵⁹

Parte seluk polítika reforma ida ne'ebé positivu hanesan hakat ida ba instituisaun militar liu atu lori FALINTIL-FDTL sai husi pardigma uluk nian.⁶⁰ Hanesan CEMGFA Lere Anan Timur hateten tenke halo duni sistema reforma para profesionaliza deit jersaun foun joven sira, nune'e bele impoin disiplina no regra militár nian.⁶¹ Maibe militár reformadu sira kontinua laiha atensaun diak

⁵⁵ Oliveira Sampaio, Luis. (2016. Abril). Diretúr Ezekutivu JSPM. Entrevista Pesoal.

⁵⁶ Idade 40 FALINTIL Nia Moris: FALINTIL-FDTL Hakat Dadaun Ba Força Moderna Nian. Disponivel iha: <http://www.fundasaunmahein.org/2015/08/18/40-years-of-falintil-falintil-fdtls-evolution-into-a-modern-force/>

⁵⁷ Tenke Reforma Membru FFDTL Ne'ebe Atinji Idade 60 Ba Leten disponivel iha: <http://www.radioliberaldadeli.com/notisia/1356-tenke-reforma-membru-ffdtl-ne-ebe-atinji-idade-60-ba-leten>

⁵⁸ Veteranu Alin La'ek, Membru militár reformadu tinan 2015, husu ba Taur Matan Ruak, Presidenti Republika durante dialogu ho Komunidade suku Trilolo, Munisipiu Baucau. Hare Jornal Timor-Post, edisaun lora 09 Dezembru 2015

⁵⁹ Taur Matan Ruak, Presidenti da Republika nia resposta ba komunidade durante dialogu ho komunidade suku Trilolo, Munisipiu Baucau. Hare Jornal Timor-Post, edisaun lora 09 Dezembru 2015

⁶⁰ Idade 40 FALINTIL Nia Moris: FALINTIL-FDTL Hakat Dadaun Ba Força Moderna Nian

⁶¹ Tenke Reforma Membru FFDTL Ne'ebe Atinji Idade 60 Ba Leten disponivel iha: <http://www.radioliberaldadeli.com/notisia/1356-tenke-reforma-membru-ffdtl-ne-ebe-atinji-idade-60-ba-leten>



husi Governu liu-liu Ministru Defeza no reforma militar ne'e ho problematiku. Militar kombatentes sira ne'ebé sei ativu iha instituisaun F-FDTL maizumenuz ema 90 hanesan ne'e iha deviza kabu, sarjentu, ofisias tenente, kapitaun no maior. Reforma militar sei kontinua ho problematiku bele sai seriu ameasa iha ba prosesu konstrusaun estadu.⁶²

Sistema reforma iha F-FDTL sei implika mos ba instituisaun militar. Ida jerasaun foun sira bele dezenvolve instituisaun ida ne'ebé modernu lolos maka bele impoin disiplina no regras militar ba membru sira.⁶³ Iha implikasaun seluk maka polítika reforma ne'e seidak satisfas ba prosesu reinserasaun militar ba vida sivil. Hanesan lisaun sira ne'ebé hatudu kompleksidade problema veteranu sai todan ida ba dezisaun sira ba estadu nian.

Tranzisaun estadu do homen ba estado de lei

“Ha'u sempre defende estadu ida tranzisaun husi estadu de homen ba estado de lei. Ita hotu jura para, bainhira ita tomak pose ita jura atu hala'o lei, aplika lei no konstituissau. Ita-nia komandante sira, tuir lei sira-nia tempu hotu liu”. (Taur Matan Ruak)

Veteranu sira nia suporta kontinua influênsia liu husi petisaun ne'ebé hatudu husi lider Forsa Armada F-FDTL nian iha sistema veteranizmu sei forte liu. Taur Maran Ruak koko atu hatur sistema formal maibe la akontese, iha sistema rua aplika kria konfuzau, Xanana Gusmão kontinua prega iha dezisaun sira iha tempu rezistencia nian, maibe Taur Matan Ruak nia hakarak transforma ida husi estadu de homen transfere ba estadu de lei. Durante dekada balun nia laran Xanana Gusmão sai lider hodi ledera nasaun ida ne'e iha tempu funu, nune'e mos iha tempu dame. Xanana Gusmão nia prezensa husi momentu barak ne'ebé sai ona sentru ba Timor-Boan sira hamutuk ba interese komun ba públiku iha Timor-Leste ho internasional sira nia konfiansa.⁶⁴

Iha tranzisaun lideransa F-FDTL Governu laiha programa ida ba lista jeneral sira ne'ebé iha ne'e atu tuir kursu formal. Tanba sa maka tranzisaun ne'ebé Xanana Gusmão hatudu ne'e to'o deit ona Taur Matan Ruak maibe Lere Anan Timur la kontinua, karik ita prezisa nafatin Lere Anan Timur iha F-FDTL? Ida ne'e presedente aat ida iha futuru. Se Lere Anan Timur halo petisaun nia asume fali kargu, ne'e signifika katak petisaun ida uluk ne'e lavale. Situasaun foun ba dadaun ne'e la'os atu transfere lideransa husi katuas sira ba jerasaun foun ka kona-bá mantein estabilidade nasional. Ida ne'e hatudu katak sistema FALINTIL nian ne'ebé aplika, Xanana Gusmão nia influênsia kontinua boot liu iha situasaun Timor-Leste nian saida deit maka Xanana Gusmão hakarak akontese, militar sira sei ladepende deit ba lei maibe mos ho ema ne'ebé ba futuru susar atu impoin regras normal no lei formal hodi ema hotu bele iha lei nia okos.

⁶² Freitas. Antonio. (2016. Abril. 04). Observador ba Asuntu Estratejiku no Relasaun Internasional. Entrevista Pesal.

⁶³Tenke Reforma Membru FFDTL Ne'ebe Atinji Idade 60 Ba Leten disponivel iha: <http://www.radioliberaldadedili.com/notisia/1356-tenke-reforma-membru-ffdtl-ne-ebe-atinji-idade-60-ba-leten>

⁶⁴ Belo, Nelson. (2014). Reznasau Xanana Gusmão Nian: Signifika Saida Los? Disponivel iha: <http://www.temptimor.com/opiniaun/reznasau-xanana-gusmao-nian-signifika-saida-los>



Nune'e hatudu katak elitus Timor-oan sira dadaun ne'e servisu hamutuk ona no laiha tan ona ru'un nehan ba malu iha polítika ho agresiva. Ida ne'e diak duni ba estabilidade nasional, maibe diak mos ba povu aileba sira iha foho ka iha distritu ne'ebé iha interese rasik dala ruma lahanesan ho sira iha Dili ka fatin urbana seluk nia interese ho klase elitus kona-bá polítika, ekonomia ho sosial?⁶⁵ Buat hotu-hotu kontinua dependente deit ba elitu Timor ne'ebé mos veteranus sira iha Dili. Iha kontestu Timor-Leste nian. Elitus Timor-oan sira ne'ebé iha tempu Portuges ho Indonézia, depois ukun-an aumenta tan elitus ne'ebé forma husi veteranu funu durante 24 anos nian sai dominante iha sira nian dezisaun iha Timor-Leste.

Ba kazu troka lideransa F-FDTL ka susesaun CEMGFA sei la'o ho sistema FALINTIL nia dominante. Xanana Gusmao hakarak demonstra nia ukun depois rezigna-an husi kargu Primeiru Ministru ba Ministru ho titlu extra-ordernariu. Ho titulu Xanana Gusmão ba kargu Ministru ne'ebé nia kria rasik ba nia-an, bele iha poder tomak atu kontrola Orsamentu Jeral Estadu (OJE) husi tasi Timor-Leste ne'ebe ezejuta husi ministériu bain-bain sira iha instituisaun estadu. Atu hatudu katak ne'e la'os ona Parlamentu Nasional, maibe iha Xanana Gusmão nia kontrola. Tutan husi ida ne'e atu kontinua sai hanesan iha tempu resistensia nia, nudar Komadante Em Chefe FALINTIL nune'e mos nu'udar Presidente CNRM ba CNRT. Dadaun ne'e nia hakarak kontinua kontrola instituisaun Militar ho Polísia. Estabilidade nasional sei dependente ba lider istoriku ka veteranu sira iha sira nia polítika. Teoritikamente Xanana Gusmão nia kargu ladun influênsia ba instituisaun Militar ho Polísia. Pratikamente nia maka bele ultima terminasaun ba alokasaun OJE ba instituisaun Militar ho Polísia. La'os ne'e deit, maibe mos iha influênsia agresiva iha veteranu funu na'in sira nia le'et. Tantu veteranu kuiñesidu nune'e mos veteranu ativu iha instituisaun estadu nian, ne'e parte ida.

Parte seluk, wainhira Taur Matan Ruak ne'ebé Xanana Gusmão prepara rasik atu sai estafeta ba ukun nian, komesa dadaun ona atu aselera mentalidade povu Timor-Leste nian ba submete estadu de homen ba estadu de lei ho agresivamente hetan bareira boot husi Xanana Gusmão, depois Taur Matan Ruak hari'i nia partidu PLP. Prezidente Repúblika Taur Matan Ruak nia dezisaun tuir Estadu de Lei katak halo ezenorasaun ho nomesaun ba CEMGFA. Iha momentu ne'ebé Taur Matan Ruak ezejuta mandatu Lei Estatuta Militar Nú 2) artigu 8 CEMGFA (FFDTL) nomeadu no exoneradu husi Prezidente da Repúblika liu husi proposta Governu nian.⁶⁶ Xanana Gusmão halo reasaun liu husi Lere Anan Timur lakohi hakruk ba dezisaun Komandante Supremu Forsa Armada Taur Matan Ruak, no hein "Maun Boot" Xanana Gusmao fila husi rai liur maka bele halo dezisaun. Depois Xanana Gusmão fila tiha mai husi rai liur, dahuluk asaun husi Lere Anan Timur maka hato'o petisaun iha liron 25 Abril 2016 ba Prezidente Repúblika Taur Matan Ruak. Kontinuasaun husi ne'e, Xanana Gusmao bolu Falur Rate Laek atu suporta petisaun ne'ebé Lere Anan Timur halo ona hasoru dezisaun Prezidente Repúblika Taur Matan Ruak. Husi ritmu polítika ida ne'e Taur Matan Ruak ne'ebé la'os jersaun tuan bele sai ponte ba jersaun foun ba transfere ukun nian, tanba Taur Matan Ruak mos bele konkista jersaun foun

⁶⁵ Belo, Nelson. (2014). Rezignasaun Xanana Gusmão Nian: Signifika Saida Los? Disponivel iha: <http://www.topotimor.com/opiniaun/rezignasaun-xanana-gusmao-nian-signifika-saida-los>

⁶⁶ Dekretu Lei No 15/2006, Estatutu Orgániku Forsa Armada F-FDTL.



hetan sasidik ba ezekusaun Estadu de Lei. Tanba sa maka relasaun Xanana Gusmão ho Taur Matan Ruak la'os ona romantiku maibe barak liu ruhun nehan ba malu? Hahu husi diskursu iha Parlamentu Nasional iha loron 25 Feveireiru 2016 to mai dezisaun sira ne'e hetok bareira boot liu tan mosu iha konjuntura politika Timor-Leste.

Tuir istoria boatus ne'ebé Timor-oan sira konta iha dalan sira iha knua ka iha to'os ka natar na'in sira konta tuir dalan katak Taur Matan Ruak ne'e Xanana Gusmão rasik maka prepara atu kaer estafeta ukun nian. Maibe tanba sa? Karik besik ona eleisaun jeral no dala barak ona Xanana Gusmão bolu Taur Matan Ruak atu lidera fali partidu CNRT maibe lakohi Taur Matan Ruak halo rasik dalan ne'ebé foun no sei mos, ka karik Xanana Gusmão hakarak halo reforma argesivamente ba partidu FRETILIN no hakarak hakotu Mari Alkatiri nia influênsia, no fo orientasaun ba Taur Matan Ruak atu ba FRETILIN maibe nia lakohi, to'o Taur Matan Ruak hamosu nia dalan polítika rasik ho forma partidu PLP. Diskusaun barak ne'ebé akontese iha comunidade nia le'et katak PLP nia presenza sai biban boot ba relasaun maun-alin Xanana Gusmão ho Taur Matan Ruak iha polítika, tanba ne'e maka Taur Matan Ruak hakarak asilera lalais ukun husi estadu de homen ba estadu de lei maibe kontinua nafatin tama iha Xanana Gusmão nia embuskada polítika iha relasaun ba ezekusaun mandatu Lei Estatuta Militar kona-bá Prezidente Repúblika nia kompetensia halo ezenorasaun ho nomesaun durante ne'e.

Finalmente Xanana Gusmão nia polítika kontinua sai vensedor ba prosesu nomeasaun ho ezenorasaun no dezisaun ikus nia husi Prezidente Republika depois konsultasaun ho Konsellu Superior Defeza no Seguransa, Lere Anan Timur ne'ebé iha Xanana Gusmão nia kontrola politika ne'ebé tuir Estadu de Lei la bele nomea ona,⁶⁷ maibe tuir nafatin estadu de homen halo nomesaun fali ba kargu CEMGFA. Instituisaun Estadu kontinua hari'i, maibe realmente tenki funsiona tuir FALINTIL nia politika, no Xanana Gusmão kontinua sei figura sentral ba instituisaun estadu atu ezersesiu nia funsionamentu ba kna'ar estadu tomak.

Konkluzan

Instituisaun forsas armadas FALINTIL – FDTL hanesan instituisaun ida ne'ebé tuan liu iha nasaun ida ne'e. Tranzisaun lideransa hanesan prosesu natural ida ne'ebé husi FALINTIL sira kontinua iha instituisaun F-FDTL nian. Prosesu tranzisaun ida ne'ebé seidak tuir lei formal no regra normal lolos maibe tuir natureza militar nian hanesan toman ida ne'ebé forsa armadas sira adopta.

Nomesaun no ezonerasaun lideransa F-FDTL prosesu lakunas lubun iha lei no regra sira instituisaun militar nian. Kompetensia orgaun soberania sira ne'ebé iha konstituisaun mos laklaru. Iha possibilidade boot polítiku sira utiliza haksesuk sira ba desizaun troka lideransa F-FDTL. Ida ne'e sei sai lisaun ida ne'ebé ba oin troka lideransa F-FDTL sai problematiku.

⁶⁷ Artigu 74, no 3, Decreto Lei No 7/2014 Estatuto dos Militares das F-FDTL hatete: mandatu CEMGFA no Vice CEMGFA (F-FDTL) durasaun maxima tinan haat, bele renova ba dala ida deit.



Rekuiñesimentu ba militar reformadu ladun klaru husi militár veteranu sira ne'ebé funu iha ailaran depois kontinua iha F-FDTL to'o reforma. Prosesu reforma dadun ne'e aplika deit ba soldadu no ofisial, kargu superior sira laregula ho lei no sai tiha problematiku wainhira troka kargu estrutura jeneral F-FDTL tinan 2016. Lakunas iha desizaun polítika no mos lei ka estatutu militar lahare didiak husi autoridade sivil liu-liu Ministru Defeza ne'e bele hamosu reforma ho problema ne'ebé kompleksu iha futuro.

Rekomendasaun

1. Rekomenda ba instituisaun orgaun soberania sira hanesan Governu, Prezidencia no Parlamentu Nasional atu hamosu komunikasaun ne'ebé diak atu ezerse desizaun ba futuro forsa armada F-FDTL tuir interdependensia Konstituisional orgaun soberania sira nian.
2. Rekomenda ba lider F-FDTL liu-liu militar veteranu sira atu halo tuir lei hodi hakruk ba desizaun sivil.
3. Rekomenda ba Governu liu husi Ministériu Defeza tenke seiru aplika polítika reforma militar ba pesoal F-FDTL ne'ebé tama ona ba idade reforma ho kondisaun no rekuiñesimentu espesial ba militar veterenu sira ne'ebé kontinua dedika-an iha instituisaun F-FDTL.



Bibliografia

- Babo Soares, Deonísio. Sec. Jeral Partidu CNRT (2014). Apresentasau iha Debate kona-bá Rezignasaun Xanana Gusmão husi kargu Primeiru Ministru iha Hotel Timor 2014. Disponivel iha: <https://www.youtube.com/watch?v=T4enKvRBux0>
- Benedito, Antei-ro. (2016. Abril.07). Dosente Politika iha UNTL. Entrevista Pesoal.
- Belo, Nelson. (2014). Rezignasaun Xanana Gusmão Nian: Signifika Saida Los?. Disponivel iha: <http://www.tempotimor.com/opiniaun/rezignasaun-xanana-gusmao-nian-signifika-saida-los>
- Boavida, João. (2016. Abril. 19). Diretúr Ezekutivu CEPAD. Entrevista Pesoal.
- Belo, Nelson. (2016. Abril 25). Observador Politika no Siguransa Nasional. Entrevista Pesoal.
- Cansio Freitas, João. Eis Ministru Edukasaun. (2014). Apresentasaun iha Debate kona-bá Rezignasaun Xanana Gusmão husi kargu Primeiru Ministru iha Hotel Timor 2014. Disponivel iha: <https://www.youtube.com/watch?v=T4enKvRBux0>
- Dekretu Lei Nú 32/2009, Rejime ba Promosaun Oficial, Jeneral sira ho Titlu ba Kargu a'as Militar nian, lora 25 Novembru.
- Diskursu CEMG F-FDTL Brigadeiro Taur Matan Ruak – Aniversáriu ba Tinan 34 FALINTIL Nia Moris. 2009. Disponivel iha: <http://www.fundasaunmahein.org/2009/08/26/diskursu-cemg-f-fdtl-brigadeiro-taur-matan-ruak-aniversariu-ba-tinan-34-falintil-nia-moris-20-09/>
- Estatutu dos Militares das F-FDTL, Decreto Lei No 7/2014
- Estatutu Organika FALINTIL-FDTL, dekreto Lei Nú 15/2006.
- Fundasaun Mahein. (2016 .Fevereiro. 23). Proposta Nomeasaun no Exonerasaun Polémika entre Prezidente da República ho Governu RDTL. Mahein Nia Lian Nú. 108. Pdf. Disponivel iha: http://www.fundasaunmahein.org/wp-content/uploads/2016/02/MNL-Nu.108_Proposta-Nameasaun-no-Exonerasun-23022016_Versaun-Tetum.pdf
- Fundasaun Mahein (2011. Marsu. 23). Veternu sira Timor-Leste dezde Krize 2006 Nian. Disponivel iha: http://www.fundasaunmahein.org/wp-content/uploads/2011/03/veterans-in-tl-since-2006-crisis-23-marcu_2011-_tetum2.pdf
- Fidelis Leite Magalhaes. (2016. Fevereiro). Disponivel iha: <http://fidelismagalhaes.blogspot.com/>
- Freitas, Antonio. (2016. Abril. 05). Observador ba Asuntu Estratejiku no Relasaun Internasional. Entrevista Pesoal.
- Fundasaun Mahein (2011. Marsu. 23). Veternu sira Timor-Leste dezde Krize 2006 Nian. Disponivel iha: http://www.fundasaunmahein.org/wp-content/uploads/2011/03/veterans-in-tl-since-2006-crisis-23-marcu_2011-_tetum2.pdf



Guterres, Frei. (2016. April.08). Xefi Kasa Militar. Entrevista Pesoal.

Gusmão, Xanana. (2013. Novembru). Intervensaun iha dialogu ba Polemika Mauk Moruk Vs Xanana Gusmão iha Centro Convensaun Dili iha Novembru 2013. Disponivel iha <https://www.youtube.com/watch?v=aFV9iqzrvul>

Gumão, Xanana (2015. Juñu) Entrevista husi Eis Ministru Negosiu Estranjeiru Indonezia, Dino Patti Djalal iha Programa Supermentor Berita Satu TV iha Indonezia. (2015. Juñu. 25) Disponivel iha: <https://www.youtube.com/watch?v=hfctrMPn-4A>

Gusmão, Xanana (2014. Janeiro) Entrevista Especial Jornalista RTTL Alisia Benigna iha Programa Ita Nia Governu tinan 2014. Disponival video iha: <https://www.youtube.com/watch?v=r23y6dR3o0s>

Konstituisaun RDTL 2002. Artigu 146 kona-bá forsa armada.

Komunikadu Imprensa Prezidencia da República loron 9 Fevereiro 2016. Disponivel iha: <http://presidenciarepublica.tl/sua-eselensia-prezidente-republika-desidi-kona-ba-susesaun-iha-ffdtl/>

Transkirsau Diskursu ba Nasaun Sua-Exelensia Presidente Republika Taur Matan Ruak Sobere Exonerasaun ba Major Jeneral Lere Anan Timur. Disponivel iha: <http://presidenciarepublica.tl/transkirsau-diskrusu-ba-nasaun-sua-exelensia-prezidente-republika-taur-matan-ruak-sobre-exonerasaun-ba-major-jeneral-lere-anan-timur/>

Oliveira Sampaio, Luis. (2016. Abril. 05). Diretúr ezekutivu JSMP. Entrevista Pesoal.